

Fenomena El-Nino yang dikesan di timur laut Pasifik berada dalam keadaan lemah

Banjir diramal tidak teruk

BESUT – Banjir diramal tetap berlaku di beberapa negeri termasuk di Pantai Timur pada akhir tahun ini tetapi tidak seburuk yang berlaku pada tahun lalu, kata Ketua Pengarah Jabatan Meteorologi Malaysia (MetMalaysia), Datuk Che Gayah Ismail (**gambar**).

Katanya, jabatannya akan terus memantau dan akan melaporkan data ramalan terkini kepada orang ramai agar penduduk terutama di persisiran pantai dapat bersedia menghadapi keadaan yang berlaku nanti.



“MetMalaysia akan mula memberi taklimat kepada pihak berkuasa negeri-negeri tentang perkembangan semasa cuaca, mulai bulan Oktober supaya semua pihak bersedia menghadapi ancaman bencana alam ini,” katanya kepada pemberita sempena Program Pengurusan Bencana Peringkat Komuniti Daerah Besut di sini semalam.

Dalam perkembangan berasingan, Che Gayah berkata, fenomena El-Nino yang dikesan berada di kawasan timur laut Pasifik buat masa ini

berada dalam keadaan lemah yang tidak akan menyebabkan berlaku cuaca monsun timur laut ekstrem di negara ini.

Katanya, seperti pada tahun lalu, walaupun ramalan menunjukkan fenomena El-Nino kuat dijangka melanda negara tetapi sebaliknya ia tidak terjadi.

“Justeru, keadaan ini tidak akan memungkinkan banjir peringkat ekstrem daripada terjadi seperti yang berlaku pada tahun lalu,” katanya. – Bernama

BEGINILAH keadaan Kampung Kemubu, Kuala Krai, Kelantan yang ditenggelami air apabila banjir besar melanda kawasan itu Disember tahun lalu.

